



Mir hei euch zum Frässe gärn

Melodie: Michael Jackson; Thriller

Es het ke Reh meh,
Will hundert Jeger trample dur e Wald.
Die sueche üs, heh!
Doch mir si schlau. Mir schliche ab, wens knallt.
Die hei e Mord-Luscht,
Wie dr Putin, wo d Ukraine frässe will.
Die hei e Mords-Fruscht:
Im Wallis sueche si, doch mir si do, April! – April!

Jeger si Killer! Kille gärn! Si säge s gäb zvil Wölf, drum wärde mir dezimiert.
Mir si im Killer-Thriller do. Mönsche gits vil zvil! Nid Wölf! Dr Mönsch ghört reguliert!

Jetzt hei mir Hunger!
Zum Glück isch hüt s Rotchäppli zue n is cho.
Jetzt nimmts üs Wunger:
Äs het üs gseit, s heig vil Grossmüeter do.
Grossmüeter munde!
Vil besser, als so blödi Schöf mit Fäll!
Mir hei Euch gfunde
Dir schmöcket eso lecker! Passet uf! Mir biisse schnäll!

Dir sit im Killer-Thriller do! Die Jeger si für d Füchs: Die si jo noni mol z Bärn
Dir sit im Killer-Thriller do! Üsi Schnauze safte! Mir hei Euch – zum Frässe gärn!!

OUUUUUUH



Elei regiere

Melodie: Hildegard Knef; Für mich soll's rote Rosen regnen

Prolog:
Könnet Dir dr Unterschied zwüsche Ankli, Kolly, Hodel,
Wyss und ere Gruppe Schwarzfahrer im Zug?
Keine! – Si si alli froh wenn ke Schaffner chunnt!

Vor paar Jahr ha n i gseit: I will – ganz vil
Wott gross si, regiere, kommandiere, reussiere
Vor paar Jahr ha n i gseit: I wott
Bi Gott, s Rothus – oder nüt

Für mi söll s roti Rose rägne!
Wott nur kompetänte Kollege begägne
Wei zäme d Regierig rot umgestalte,
Wei schalte und walte, und üs entfalte.



Und hüt do säg I kenschterniert, pikiert,
Die wo mi bim regiere geniere, muesch führe!
Jo hüt säg I dezidiert, ungeniert:
Wär nid folget, ghört abserviert:
Für mi söll s roti Rose rägne!
Und wenn i nur ständig so
Zwärgli begägne,
Wo Schiss und au chronisch nüt z säge hei,
Denn isch s glaub am beschte – i regiere elei!

Das seit me nümme

Melodie: Harry Belafonte; Banana Boat Song



Theo! I ha do...
Pass uf. Villicht seit me das nümme!
Theo! I ha do es Ding, fein für d Ching, inne wiss,
usse bruun, so us Schoooggi?
«Mohrechopf», das seit me würklech nümme!

E dunkel Pigmäntierte us Afrika?
«Neger», das seit me würklech nümme!
E Ur-liwohner us Nord-Amerika?
«Indianer», das seit me würklech nümme!
E Bewohner us Grönland, wo im Iglu läbt?
«Eskimo», das seit me würklech nümme!
E Fahrende im Wald, wo öppe Chessel chläbt!
«Zigüner», das seit me würklech nümme!

Theo! Dä Typ do...
Mir gseh s. Und das isch würklech schlimm!
Theo! Dä Typ! Ke Kultur vo Natur us, wohnt stur
ire völlig troschtlöse Umgäääbig?
Nei, «Gränchner», das seit me würklech nümme!

Mir warte druf

Melodie: Polo Hofer's Schmetterding; Wenn mys letschte Schtündli schlaht



Uf Kamerade! Mir hei e länge Schnuuf!
Solang das s Wasser het ir Aare tüe mir warte druf!
Nid nur e Ewigkeit! Nei: Bis mir es fähigs Bauamt hei!
Bis s Gäld rägnet und s Kurhuus räntiert, ufem Wissestei.
Wenn dis Kamel dur s Nadelöhr spaziert,
Wenn d Hasematt i d Nordsee isch erodiert,
Wenn nach em jüngschte Tag em Liebgott si Bart ergraut:
Denn wird dä Aarestäg villicht baut!

Kinderspiele

Melodie: Kinderlied; Itsy bitsy spider

«Cowboy und Indianer» spielt me nümme.
Das isch passé.
«Batman gäge Superman» isch in
und fägt vil meh.
«Räuber und Polizischt» isch out.
Das fägt nid mol mit Hänker.
Stattdesse spielt me «UBS und CS:
Krieg der Bänker».
Au «Dökterlet» wird nümme,
nid mit Unggle, nid mit Tante.
Das Spili, das heisst jetze schint's:
«Pfarrer und Minischtrante»!



Gendern verboten!

Melodie: Die Prinzen; Küssen verboten

O liebe Elter und liebi Elterin:
Mir si vo r Kanti und hei nur s Beschte im Sinn.
Will jedi Lehrkraft und jedi Lehrkräftin
Vermittle gschlächter-gerächte Unterricht:In
Vom Mathematickende bis zur letschte Fänschterbänkler:In
Gilt inkludierend-nonbinäri Sprochdisziplin!

Und jetz das! Mir chöi s nid fassel! Nei, mir glaube mir spinne
Si die Mittelschuel-Beamtende de völlig vo Sinne?!

**GENDERN VERBOTEN! GENDERN VERBOTEN!
GENDERN VERBOTEN!**


Streng verboten!
Ke Kanti-Akademikende hätti das je glaubt: Gendere isch
nümme erlaubt!

**GENDERN VERBOTEN! GENDERN VERBOTEN!
GENDERN VERBOTEN!**

Streng verboten!
Ke Kanti-Akademikende hätti das je glaubt: Gendere isch
nümme erlaubt!

Und git d Lehrerin wäg däm e schlächti Note, denn isch gnue!
Säg ere «Jetz längt s. Dir sit e...»


MUNI MIT MILCHFUNKTION!>





Was cha dr Alain denn drfür?

Melodie: Robert Stolz; Was kann der Sigismund dafür, dass er so schön ist



Dr Alain het als Bundesrot d Schwiz vor Corona gschützt.
Das het dr Pharma gnützt – und zimlech Gäld verhützt.
Öb Fraue-, Flugzüg-, BLICK-Affäre – gar nüt macht ihn schlapp!
Das heisst, es isch verjährt: Jetz isch er ab!

Was cha dr Alain denn drfür, dass är so schlau isch?
Was cha dr Alain denn drfür, dass är gäng schlüüft?
Was söll do schlächt dra si, dass är e Rampesau isch?
Muesch chli beweglech si, und Schwein ha – und das ghüüft!

Was cha dr Alain denn drfür, dass är so schlau isch?
Was macht dr Alain für dass s Volk und d Press ihn schetzt?
Und dass är gäng ab cha, bevor dr Super-GAU isch?
Raffiniert muesch si und immer guet vernetzt!

D Liechtli vom Wyssestei

Melodie: Gospel; This Little Light Of Mine

Auszug aus dem Lösch- und Vogelschutzreglement vom Kurhus:
• Am Donnschtig, wenn s rägnet, bi Vollmond isch Lösche ab 22:30.
Falls dr Blaufilter zum Isatz chunnt, ab 23:15.
• Im Auguscht, im Obsigend, wenn d Venus im achte Hus stoht bi Südwestwind,
isch komplett Lösche ab 21:45
• Im Septämber mit Bise, wenn dr Güggel vor de Hüener is Bett goht,
isch lösche bi Halmond ab 22:43, bi Neumond

D Liechtli vom Wyssestei – tüt se nid lösche, Nei!
D Liechtli vom Wyssestei – mir si froh, dass mir se hei
Mit Liechtli vom Wyssestei – fühlle mir üs dehei.
Nid Lösche, Nei! Nid Lösche, Nei! Nid Lösche, Nei!

E Vogu flügt ganz elei – übere Wyssestei,
froh, dass mir Liecht do hei – süsch fändi är nümme hei.
Wenn mir ke Liecht do hei – bliibt dä no lang elei!
Nid Lösche, Nei! Nid Lösche, Nei! Nid Lösche, Nei!

Vögu chöme ohni Bei – übere Wyssestei.
Dasch will si Flügel hei. Nid eine nur, nei, zwöi.
Wenn die nid flüge chöi – wills schwarz isch ufem Wyssestei:
Müedi Bei! Müedi Bei! Nid Lösche, Nei!

Ei Vogu leit es Ei. Zwe Vögu legge zwöi!
Si wüsse nid, ischs eis, ischs zwöi – will si nacht so dunkel hei!
Hälfe tuet do elei – es Liecht ufem Wyssestei!
Nid Lösche, Nei! Nid Lösche, Nei! Nid Lösche, Nei!

Nid Lösche, Nei! Nid Lösche, Nei! Nid Lösche, Nei!

Zwe Vögu die si gay – will si kes Wiibli hei
Dr eint seit em ander: hey! – So git das nie kes Ei
Mir finde keis Wiibli, nei – ohni Liecht ufem Wyssestei!
Nid Lösche, Nei! Nid Lösche, Nei! Nid Lösche, Nei!

Nid Lösche, Nei! Nid Lösche, Nei! Nid Lösche, Nei!



Bim Rote Liechtli ar Löiegass

Melodie: Robert Stolz; Im weissen Rössl


Wenn am Donnschtig Zobe wettsch go poschte do,
De merksch: S'isch keine do. S herrscht töifschti Rueh!
Nach de Achte no n es Bierli übercho,
Chasch grad vergässe do! S git nüt! S isch zue!

Chunnsch zum Bieltor ii, de packt di s Gruuse do.
Will alli pfluuse scho! D Stadt isch wie tot.
Doch ändlech – Halleluja! – isch d Erlösig cho!
I weiss es Plätzli do, wo alles stoht(!):

Es chunnt es Hüsl a d Löiegass,
Dört wirdsch Du immer bedient!
Me tuet Di luschtvoll umsorge
Und kei Mönch seit «**SORRY ABER JETZ ISCH
D KAFFIMASCHINE SCHO PUTZT!**»

Und au wenn Du bis am Morge blifsch,
Hesch durchgehend Luscht und hesch Spass!
Und kei Mönch rüeft «chasch mer bloose»!
Usser du wotsch's wie d Franzose
Mit Strümpf oder mit Läderhose
In griechisch und römischer Pose
Für Handwärker, Lehrer, Matrose
Zahl't's d Kasse au gäge Arthrose
Lokal und in Ganzkörperdose
Mit Latex und mit Cellulose
Mit Nidle us Kisag-Spraydose

Und nie meh dänksch «toti Hose!»
Ir Altstadt ar Löiegass!




Königin InGold

Melodie: Kinderlied; Itsy bitsy spider

D Mumie vom Cheops steckt im goldig Sarkophag.
Dä steckt ir Pyramide. Bis ne findsch suechsch mänge Tag.

D Königin vom Grossmogul, die steckt im Tadsch Mahal.
Die goldig Greberchammere suechsch im ne riese Saal.

So Dänkmol gits au z Soledurn. Muesch gar nid lang go sueche:
Üsi Königin In-Gold, versteckt im Sutter-Königschueche.



Lieferchetti

Melodie: Mani Matter; Dr Alpeflug

Wär Sunnekollektore wott montiere, bruucht Geduld.
Bis das Züg chunnt, wartisch ewig, d Lieferchetti sigi tschuld.
Au uf Hueschtesirup wartisch, schnäll paar Monet bis er chunnt,
dr Suezkanal isch gschlosse, wenn er chunt, bisch lengschters gesund.

Schruube, Halstablette, Möbel, Transischtore, Paprika,
hei vil lenger, denn si müesse rund ums Horn vo Afrika,
Denn uf Chlibüs dure Kongo mit Machete uf Asmara,
Dört verlade uf Kamel, e Karawane dur d Sahara.



Mit em Schluchboot uf Granada,
rund um Island uf Paris.
Denn dr Rhi zdüruuf und mit em
Bipperlisi do zu üs.
Wo die Gschicht äch ändet, frogsch di,
doch gigantisch isch dr Fruscht,
Denn au d Pointe für dä Vårs
chunnt allerfrüechstens im
Auguscht.